

## **“ХӨВСГӨЛ СОРИЛТ” УНАДАГ ДУГУЙН БАРТААТ ЗАМЫН ЗУНЫ АЯЛЛЫН ЖУРАМ**

### **1. Аяллын тодорхойлолт**

- 1.1. “Хөвсгөл сорилт” унадаг дугуйн бартаат замын зуны аялал нь Монгол улсын Хөвсгөл нуурыг бүтэн тойрох унадаг дугуйн аялал юм.
- 1.2. Хэдийгээр энэхүү аялал нь уралдаан, тэмцээн биш боловч, дугуйчдын хүч чадал, тэсвэр тэвчээр шаардсан, хүнд сорилт болно гэдгийг сайтар ойлгох хэрэгтэй.

### **2. Mongolian Khuvsgul Offroad Summer Bike Challenge аяллын зохион байгуулагч**

- 2.1. MB (Mongolian Bike) олон улсын унадаг аяллын холбоо нь албан ёсны зохион байгуулагч юм. Цаашид “Зохион байгуулагч” гэж явна.
- 2.2. MB (Mongolian Bike) олон улсын унадаг дугуйн аяллын холбоо нь нийгэмд үйлчилдэг, ашгийн төлөө бус, төрийн бус байгууллага юм.
- 2.3. Зохион байгуулагч нь аяллын журмыг өөрсдийн үзэмжээр хэрэглэж, мөн нэмж, өөрчилж болно.
- 2.4. Аяллын журамтай холбогдолтой эцсийн шийдвэр гаргах эрхийг зохион байгуулагч эдэлнэ.
- 2.5. Зохион байгуулагч нь аялал тус бүр дээр аялал зохион байгуулах баг, түүний ахлагчийг томилон явуулна. Аяллын ахлагч зохион байгуулагчийг бүрэн эрхийг хэрэгжүүлнэ.

### **3. Ерөнхий шаардлага ба журмыг хүлээн зөвшөөрөх**

- 3.1. Энэхүү журам нь аюулгүй, шударга, байгаль орчинд хор хөнөөлгүй аяллыг зохион байгуулахад оршино.
- 3.2. Аялалд оролцогч бүр нь аяллын албан ёсны журмыг сайтар уншиж ойлгосон байх ба хүлээн зөвшөөрсөн тохиолдолд аялалд оролцохоор бүртгүүлж болно.
- 3.3. Энэхүү журмууд нь “Хөвсгөл сорилт” унадаг дугуйн бартаат замын зуны аяллын зохион байгуулагчийн тантай хийгдэх хууль ёсны гэрээг төлөөлөх болно.
- 3.4. Энэхүү журмыг биелүүлээгүй тохиолдолд зохион байгуулагч нь аялалд оролцогчийн эрхийг хасах хүртэл арга хэмжээ авна. Аяллаас хассаны хариуцлагыг зохион байгуулагчаас хүлээхгүй бөгөөд аяллаас хассан талаар ямар нэг тайлбар хийхгүй байж болно.
- 3.5. Аялал нь биеийн хүчний өндөр ачаалал шаардах ба эрүүл мэнд, бие организм тань эрсдэлд орж болзошгүйг хүлээн зөвшөөрнө.
- 3.6. Аяллын явцад төхөөрөмж нь эвдрэх, биеийн шингэний дутагдалд орох, даралт ихсэх, ядрах, зам дээр бусад аялагч, ямар нэгэн хөдөлгөөнт зүйлс болон авто машинтай мөргөлдөх, осолд орох, цаг агаарын нөхцөл байдал, байгалийн гамшиг, үер ус, гал түймэр, гэмтэл бэртэл, өвчин гэх мэт ноцтой шалтгаануудаар гэмтэж бэртэх, цаашлаад нас барах зэрэг бодит эрсдлүүдийг хүлээн зөвшөөрнө.
- 3.7. Аялал зохион байгуулагдаж байгаа улсын хууль дүрмийг сахин биелүүлж, нутгийн хүмүүс болон аялалд оролцогч бусад хүмүүс, зохион байгуулагч, сайн дурын ажилтан, эмнэлэгийн ажилтнуудад хүндэтгэлтэй хандаж, тэдэнтэй зөв боловсон харьцаж, биеэ зөв авч явна.

- 3.8. Нэмэлт тусгай заалтууд энэхүү журамд багтаагүй тохиолдолд зохион байгуулагчийн шийдвэрийг дагана.
- 3.9. Аялал нь монгол, англи хэл дээр явагдана.
- 3.10. Таны зан төлөв байдал аяллын явц, аялалд оролцогч бусад этгээд (бусад дугуйчин, дагалдагч, зохион байгуулагч, сайн дурынхан болон эмнэлэгийн ажилтнууд)-ын аюулгүй байдал, сайн сайханд садаа болохгүй, аливаа өмнөх эсэргүүцэлтэй холбоотойгоор өсөрхсөн сэтгэлээр бусдад хандахгүй байна.
- 3.11. Журмын агуулга, тэдгээрийг хэрэглэхтэй холбоотой асуудлыг олны өмнө эсэргүүцэх, зохион байгуулагчийн ажилтанг гутаан доромжилбол аяллаас хасах үндэслэл болно.
- 3.12. Аяллаас түгээж буй фото зураг, албан ёсны блог, и-мэйл, веб, зар сурталчилгааны материалууд нь зохион байгуулагчийн онцгой өмч бөгөөд бичгээр зөвшөөрөл авалгүйгээр хуулж болохгүй.
- 3.13. Оролцогч нь аялал эхлэхээс өмнө цагтаа ирсэн байх ёстой.
- 3.14. Хэрвээ энэхүү журмын аль нэг заалт хууль бус, эсвэл өөр нэг шалтгаанаар даган мөрдөгдөхгүй бол зөвхөн тухайн заалтын хувьд хамаарах ба харин бусад үлдсэн зүйл заалтыг хүчин төгөлдөр даган мөрдөхөд саад болохгүй.
- 3.15. Нэг гэр бүлийн эхнэр нөхөр аялалд оролцож байгаа тохиолдолд аяллын багийн нэг гишүүний адил эрх, үүрэг хүлээж, багийн уур амьсгалыг эвдэхгүй байна.

#### **4. Аялалд бүртгэх нөхцөл**

- 4.1. Аялалд цахим хуудсаар дамжуулан мэдээллийн маягт бөглөн бүртгүүлнэ.
- 4.2. Аялалд оролцох улсад нэвтрэх паспорт, виз, хилийн шалгалтын бүх шаардлагыг биелүүлсэн байна. Бүртгэлийн маягт бөглөхөөсөө өмнө аялал зохион байгуулагдаж буй улсын Элчин сайдын яам, консулын газраас зохих мэдээллүүдийг авч тухайн улсад нэвтрэх шаардлагыг хангасан байна.
- 4.3. Аялалд оролцох эрхийг бусдад шилжүүлэхгүй, дамжуулахгүй, өөрчлөхгүй.
- 4.4. Аялалд 16-70 насны аль ч улсын иргэнийг ялгаварлан гадуурхалгүйгээр оролцуулна.
- 4.5. Бие, эрүүл мэндийн нөхцөл нь аялалд тохирсон байна.
- 4.6. Аялалд оролцогч бүр өөрийн эрүүл мэндтэй холбоотой хариуцлагаас зохион байгуулагчийг чөлөөлөх зөвшөөрлийн маягтанд гарын үсэг зурна.
- 4.7. Дугуйчны авчрах унадаг дугуй болон хэрэглэл нь энэхүү аяллын зорилгоо биелүүлэхэд нийцэж байвал зохино.
- 4.8. Мэргэжлийн тамирчид аялалд оролцож болно.
- 4.9. Энэхүү аялалд оролцохоос өмнө дугуйчин биеийн болон хувийн бэлтгэлээ маш сайн хангасан байна.
- 4.10. Оролцогч нь ирж, буцах тасалбараа хамт авч ирнэ.

#### **5. Хувцас хэрэгсэл**

- 5.1. Оролцогч нь цаг агаарын нөхцөлд таарсан дулаан хувцас, хэрэглэлээ өөрсдөө бэлтгэж ирнэ.
- 5.2. Оролцогч гэнэтийн температурын өөрчлөлтөнд бэлтгэлтэй байх хэрэгтэй.
- 5.3. Дугуйгаар аялахдаа тогтмол хамгаалалтын дуулгаа өмсөж, шүгэл, хөнгөн цагаан хальс, GPS, толгойн чийдэн, толь, гал гаргах хэрэгсэл, хутга зэргийг заавал биедээ авч явна.

- 5.4. Дугуйчин өөрийн тоног төхөөрөмж, хэрэгслээ өөрөө авч явна. Бусад оролцогчдод өгч явуулахыг хориглоно.
- 5.5. Аяллын явцад зохион байгуулагч нь цаг агаарын нөхцлөөс шалтгаалан тоног төхөөрөмж, хувцас хэрэгслээ солихыг шаардаж болно.
- 5.6. Аялалд оролцогч өөрийн тоног төхөөрөмж, эд зүйлсээ хариуцах бөгөөд даатгалд хамруулсан байхыг зөвлөж байна.

## **6. Унадаг дугуй**

- 6.1. Унадаг дугуй нь аяллын бартаа саадыг туулах чадвартай байна.
- 6.2. Аялалд зөвхөн хоёр дугуйтай, хөлийн булчингаар ажилладаг, уулын болон элсний унадаг дугуй авчирна.
- 6.3. Унадаг дугуйн жолооны бариул, гол, дөрөө нь бусдын гар хөлийг урахгүй, арзгар ирмэггүй байх ёстой.
- 6.4. Унадаг дугуйндаа урд, хойд гэрэл суурилуулсан байна.

## **7. Гараа, бариа, аяллын явц**

- 7.1. Бүх оролцогчид нэгэн зэрэг гараанаас гарна.
- 7.2. Гараа эхлэхээс 10 минутын өмнө дугуйчин гарааны талбайд ирсэн байна.
- 7.3. Гараа эхэлснээс хойш 10 минутын дотор дугуйчин ирэхгүй бол тухайн өдрийн аяллаас хасаж, автомашинд сууж, аяллыг үргэлжлүүлнэ.
- 7.4. Аялал нь цагт 5-20 км-ийн дундаж хурдтай явна.
- 7.5. Аяллын явцад 5-15 км тутамд түр зогсож, 10-15 минут амарна.
- 7.6. Аяллын толгой болон сүүлд зохион байгуулагч багийн зүгээс нэг нэг хүн аялалд оролцогчдыг хашиж явна.
- 7.7. Аяллын явцад ямарч тохиолдолд согтууруулах, мансууруулах бодис хэрэглэхийг хориглоно.
- 7.8. Аяллын замд хэрэглэх ус, цай, кофе, печень зэрэг хүнсийг дугуйчин өөрийнхөө унадаг дугуйндаа авч явна.
- 7.9. Аяллын замын ихэнхи хэсэгт гар утасны сүлжээ байхгүй болно.
- 7.10. Аялалд оролцогчид урьдчилан гаргасан зам болон зайг бүрэн дуусгах ёстой.
- 7.11. Тухайн өдрийн аялал эхлэхээс өмнө таны тоног төхөөрөмж, хувцас хэрэглэл зорилгодоо тохирч байгаа эсэхийг шалгаж баталгаажуулсан байна.

## **8. Оролцогчдын тодорхойлолт**

- 8.1. Аяллын өмнө дугуйчин бүр хувийн дугаар, дарцаг авна.
- 8.2. Дугуйчин бүр аяллын дугаараа унадаг дугуй болон хувцсан дээрээ байнга ил харагдахаар зөв байрлуулна.
- 8.3. Оролцогч нь цаг үргэлж тухайн аяллын эмблем, тухайн улсын далбааг хадсан цээживчийг өмссөн байна.
- 8.4. Аяллын цээживчийг гадна хувцасныхаа гадуур өмсөнө. Цээживч болон дугаарыг буруу байрлуулахыг хориглоно.
- 8.5. Аяллын явцад дугаар тэмдэг нь гэмтсэн тохиолдолд холбогдох ажилтнуудад өгч солиулна.

8.6. Аяллын эхэнд болон сүүлд яваа зохион байгуулагчийн оролцогч нь албан ёсны өөр өнгийн хувцас өмсөж ялгарна.

8.7. Зохион байгуулагч болон туслах ажилтнууд, завьчин нар өөр өнгийн цээживчээр ялгарна.

## **9. Аяллын зам, чиглэл, аюулгүй байдал**

9.1. Бүх оролцогчид өөрийн аюулгүй байдлыг хангаж оролцох бөгөөд энэ талаар бүрэн ойлголцогчид байх ёстой.

9.2. Аялалд оролцогч бүр албан ёсны чиглэлийг байнга дагаж, зам товчлохгүй явна.

9.3. Аяллын замд ямар нэг тэмдэг тэмдэглэгээ хийхгүй.

9.4. Толгойн газарчин дугуйчинг гүйцэж түрүүлэхгүй бөгөөд зогсвол бүгд зогсоно.

9.5. Оролцогч нь ямар нэгэн шалтгаанаар чиглэлээсээ гарсан тохиолдолд зам товчлохгүйгээр тухайн гарсан замаараа буцаж чиглэлдээ нэн даруй орно.

9.6. Албан ёсны замын маршрутыг зөрчиж замаас гарсан оролцогч нь энэхүү хугацаанд тохиолдож болох аливаа гэмтэл эрсдэлийн хариуцлагыг өөрөө хүлээх болно.

9.7. Аяллын ахлагч нь зайлшгүй шаардлага болон аюулгүй байдлыг харгалзан аяллын чиглэлийг хэсэгчлэн болон бүрэн өөрчилж болно.

9.8. Аяллын газрын зураг дээр заасан маршрут орон нутгийн иргэдийн тухайн жилд аюулгүй байдал, бартаа саадыг туулах үүднээс гаргасан харилцан аюулгүй зам юм.

9.9. Аяллыг нисдэг тэргээр буюу агаараас хянах боломжгүй болно.

9.10. Аяллыг ямар нэг автомашин дагалдахгүй.

9.11. Аялалд оролцогч бүр аюулгүй байдлын үүднээс GPS төхөөрөмж хэрэглэнэ.

9.12. Дугуйчин аяллын явцад гэмтэж аяллыг цааш үргэлжлүүлэх боломжгүй болсон, эсвэл хэт ядарсан, өвчилсөн бол тухайн оролцогчийг автомашин, эсвэл завиар зөөнө. Энэ тохиолдолд тээврийн зардлыг оролцогч төлнө.

9.13. Цаг агаар огцом өөрчлөгдөж аюултай байдал үүсвэл бүгдийг завиар зөөнө.

9.14. Аялал төлөвлөсөн цагтаа багтахгүй харанхуй болсон бол бүх аялагчдыг дараагийн хоноглох газарт завиар зөөвөрлөж хүргэнэ.

9.15. Ямарч нөхцөлд аяллын замын хажууд унтаж болохгүй.

9.16. Нуурын ойр орчмын гол нь бороо ус ихтэй үед үерлэсэн, эсвэл хадан хясаа тулж гатлах боломжгүй бол аяллын чиглэлийг өөрчилж болно.

9.17. Завин дээр суусан оролцогч завьчны заавар зөвлөгөөг дагана.

9.18. Аяллын багийн гишүүн бүр усны аюулгүй хантааз авч явах бөгөөд завин дээр суухаас өмнө өмсөж завинд сууна.

## **10. Ивээн тэтгэгчид**

10.1. Оролцогч нь зохион байгуулагчийн зүгээс өгсөн ивээн тэтгэгчийн тэмдэг, логог өөрчлөхгүй, ил харагдахаар газар байршуулна.

10.2. Тухайн оролцогчийн ивээн тэтгэгчийн тэмдгийг зохион байгуулагчийн зүгээс аялалд нийцээгүй гэж үзвэл хориглож болно.

## **11. Механик тусламж**

11.1. Оролцогч бүр өөрийн унадаг дугуйны засвар, үйлчилгээ, тохиргоо цэвэрлэгээг хариуцаж, хүчин чадлыг тооцоолох хэрэгтэй.

- 11.2. Аяллын багийн бүрэлдэхүүнд унадаг дугуйтай засварчин дагалдан явах бөгөөд дугуйчин өөрийнхөө дугуйг засаж чадахгүй тохиолдолд аяллын явцад засах боломжтой засварыг засан тусална.

## **12. Эмнэлэгийн тусламж ба даатгал**

- 12.1. Аяллын хугацаанд дугуйчинд эмнэлэгийн тусламж үзүүлэхэд мэргэжлийн эмч дагалдан явахгүй.
- 12.2. Аялалд оролцогчид өөрсдийн тогтмол хэрэглэдэг эм, эмийн бэлдмэлийг ямагт биедээ байнга авч явна. Биедээ авч яваагүйн улмаас хэрэглэж чадаагүйн хариуцлагыг зохион байгуулагч тал хүлээхгүй.
- 12.3. Аялалд оролцогч ямарваа нэгэн хууч өвчтэй тохиолдолд аялалд оролцохоосоо өмнө зохион байгуулагчид мэдэгдэх үүрэгтэй.
- 12.4. Аяллын үед гарч болзошгүй осол аваарын улмаас авсан гэмтэл, бэртлийг бусад дугуйчдын тусламжтайгаар шуурхай тусламж үзүүлэх маягаар шийдвэрлэнэ.
- 12.5. Аялалд оролцогчид бүгд сайн дурын үндсэн дээр оролцох шийдвэрийг гаргах тул зохион байгуулагч нь аяллын үеэр гарсан болзошгүй осол аваар, өвчинд хариуцлага хүлээхгүй.
- 12.6. Аялалын үед өөр оролцогч гэмтэж бэртсэн тохиолдолд нэн даруй зохион байгуулагчид мэдэгдэнэ.
- 12.7. Гэмтсэн болон өвчтэй оролцогч өөрийн хүсэлтээр аяллаа зогсоож болно. Эсвэл зохион байгуулагч нь эмчтэй зөвлөлдөж, эсвэл зөвлөлдөлгүйгээр аялалд оролцуулахгүй байж болно.
- 12.8. Зохион байгуулагч нь аялалд оролцогчдын хувь хүний эрүүл мэндийн даатгалыг хариуцахгүй. Оролцогч заавал хувь хүний эрүүл мэндийн даатгалтай ирнэ.
- 12.9. Оролцогчид нь эмнэлэгийн ажилтан, албан хаагчдад эрүүл мэндийн онцгой нөхцөлд шаардлагатай бүх арга хэмжээ авах эрхийг олгоно.
- 12.10. Эрүүл мэндийн онцгой нөхцөл байдал үүссэн үед “яаралтай үед холбоо барих хүмүүс” рүү аль болох боломжоороо түргэн холбогдож мэдэгдэнэ.
- 12.11. Аялал зохион байгуулагдаж байгаа газарт эмнэлэг байхгүй, хамгийн ойр эмнэлэг хүртэл тээврийн хэрэгслээр олон цаг явах алс бөглүү газарт зохион байгуулагдаж байгааг хүлээн зөвшөөрнө.
- 12.12. Онцгой байдлын тусламж үйлчилгээ маш удаан хугацаанд ирэх юм уу, зарим тохиолдолд огт байхгүй газарт аялал зохион байгуулагдаж байгааг хүлээн зөвшөөрнө.

## **13. Тусламж дэмжлэг**

- 13.1. Тусламж дэмжлэгийг зөвхөн аялалд оролцогчдод зөвшөөрнө.
- 13.2. Аяллын бүрэлдэхүүнд ороогүй унаа машин, мотоцикл, бусад тээврийн хэрэгсэлд суух, гаднаас ямар нэг тусламж дэмжлэг авахыг хориглоно.

## **14. Цагийн хуваарь**

- 14.1. Аялал нь тогтсон цагийн хуваарьтай байна.
- 14.2. Аялалд оролцогчид цагийн хуваарийг чанд сахих үүрэгтэй.

- 14.3. Аюулгүй байдлын шалтгаанаар зохион байгуулагч нь цагийн хуваарийг шинэчлэх, бууруулах, нэмэгдүүлэх эрхтэй. Шинэчилсэн цагийн хуваарийг тухайн шатны гараанаас өмнө зааварчилгааны үеэр оролцогчдод мэдэгдэнэ.
- 14.4. Аялал үргэлжилж байгаа үед хүрээлэн буй орчны аюулгүй байдлын үүднээс цагийн хуваарийг өөрчилж болно.
- 14.5. Өглөөний цайны төгсгөлд тухайн өдрийн аяллын талаар товч зааварчилгаа өгнө.
- 14.6. Оройн хоолны төгсгөлд өдрийн аялал болон маргаашийн гарааны цаг, техникийн асуудал болон замын талаарх мэдээллийг товч танилцуулна.

## **15. Дагалдан явагч**

- 15.1. Дагалдан явагч хүмүүсийг унадаг дугуйн аялалд дагуулж явахгүй, харин Хатгал дахь жуулчны баазаас гаргаж өгөх, тосохыг зөвшөөрнө.
- 15.2. Аяллын бүрэлдэхүүнд орсноос өөр автомашин дагалдан явахыг хориглоно.
- 15.3. Хэрэв дагалдагч 16 насанд хүрээгүй бол аялалд оролцохыг хориглоно.
- 15.4. 16-18 насныхан оролцох бол эцэг эх, асран хамгаалагчаасаа зөвшөөрөл авна.

## **16. Аяллын бусад ачаа**

- 16.1. Нэг аялагчид унадаг дугуйнаас гадна нийтдээ 30 кг-аас илүүгүй, 0,3 кубээс томгүй нэг эсвэл хоёр цүнхийг зөвшөөрнө.
- 16.2. Цүнхийг өглөө 07:30 цагаас өмнө хооллох газрын үүдний заасан талбайд орхино.
- 16.3. Цүнхэн дээрээ нэр болон дугаараа хадаж тавина.
- 16.4. Аяллын дараа цүнхээ хооллох газрын үүднээс буцааж авна.
- 16.5. Цүнх сав нь ус нэвтэрдэггүй байна.

## **17. Хэвлэл мэдээлэл ба зургийн эрх**

- 17.1. Зохион байгуулагч нь аяллын үйл явдлын зургийг авах бүрэн эрхтэй. Аялалд бүртгүүлснээр оролцогч зохион байгуулагчид өөрийн нэр, зураг болон бусад зүйлийг ашиглах эрхийг автоматаар олгоно.
- 17.2. Аяллын явцад хувиараа авсан зураг видеог зөвхөн хувийн зорилгоор ашиглаж болно.
- 17.3. Аяллаас түгээж буй фото зураг, албан ёсны блог, и-мэйл, зар сурталчилгааны материалууд нь зохион байгуулагчийн онцгой өмч болно. Аяллын зургийг зөвшөөрөл авалгүйгээр тараахыг хориглоно.
- 17.4. Гадны зураглаач, фото зурагчин зохион байгуулагчаас зөвшөөрөл авна.

## **18. Хүрээлэн буй орчин**

- 18.1. Хүрээлэн буй орчиндоо аюул занал, хор хөнөөл учруулахгүйгээр амьдарч, үр хойчдоо онгон зэрлэг байгаль дэлхийгээ өвлүүлж үлдээх нь хүн төрөлхтний үүрэг гэдгийг аялалд оролцогч бүр ухамсарлаж ойлгоно.
- 18.2. Энэхүү үйл ажиллагааны спортлог шинж чанар, байгаль орчин болон орон нутгийн иргэдийг хүндэтгэх үүднээс аялагч бүр аяллыг зохион байгуулагчийн зүгээс өгөх зааварчилгаа, зөвлөмжийг чанд сахиж мөрдөх нь байгаль болон нутгийн иргэдийг хүндэтгэж хамгаалах үндэс болох юм.

- 18.3. Хөвсгөл нуурын эрэг дээр хогны ул мөр үлдээхгүй байна. Хогийн цэгүүдийг зөвхөн хооллох ундлах цэгүүдийн эргэн тойронд байрлуулна.
- 18.4. Аяллын явцад ундааны шил, аяга, боодлын цаас эсвэл өөр аливаа хогоо хаяхыг хориглоно.
- 18.5. Аялагчид өөрсдийн унадаг дугуйгаа урсаж буй гол, горхинд угааж цэвэрлэхийг хориглоно. Урсаж буй гол, горхинд химийн гаралтай бодис, уусмал, шингэн мэтийг асгаж болохгүйг онцгой анхаарна уу. Учир нь эдгээр цөөрөм, нуур, гол, горхи нь нутгийн оршин суугчдын цорын ганц ундны усны эх үүсвэр юм.
- 18.6. Амралтын газруудад ил гал гаргахыг хатуу хориглоно.

## **19. Замын хөдөлгөөний дүрэм**

- 19.1. Аяллын зам дээр орон нутгийн иргэдийн автомашин зорчихтой дайралдах бөгөөд баруун гарын дүрмийг барьж зөрнө.

## **20. Хоноглох байр**

- 20.1. Аяллын явцад хоноглох байр нь таны өдөр тутмын байрнаас ая тухгүй байвал тухайн байдлыг хүлээн зөвшөөрнө.
- 20.2. Аялалд оролцогч заасан гэр, байшиндаа, заасан оронд унтана. Кэмпээс өөр газар унтаж болохгүй.
- 20.3. Байр сууцандаа бусдыг байлгах, хонуулахыг хориглоно.
- 20.4. Байранд блог хөтлөх, и-мэйл илгээх болон бусад холбоо барих зорилгоор зөөврийн компьютер ашиглуулж болно. Аяллын явцад ямарваа нэг интернэт хуудсанд нэвтрэхийг зөвшөөрөхгүй.

## **21. Бие засах газар**

- 21.1. Суурин газрын жуулчны баазуудад байх үед бие засах газруудыг ашиглана.
- 21.2. Замын отогт ухсан нүхэн жорлонд бие засна.

## **22. Шагнал, торгууль**

- 22.1. Аяллыг дуустал оролцсон оролцогч албан ёсны гэрчилгээ болон дурсгалын медаль (Finish тэмдэг) авах болно. Харин цаг агаарын нөхцөл байдлаас болж зохион байгуулагч талаас завь болон автомашинд ачсан тохиолдолд хамаарахгүй.
- 22.2. Хэрвээ аялалд оролцогч хадан хясаа тойрох, үертэй гол тойрох, цаг агаарын нөхцлөөс бусад тохиолдолд завин дээр суусан тохиолдол бүрт 100,000 төгрөгний торгууль (завьны хөлс) төлнө.

## **23. Хөнгөлөлтийн карт**

- 23.1. MB (Mongolian Bike) олон улсын унадаг аяллын холбооноос зохион байгуулсан “Хөвсгөл сорилт” унадаг дугуйн мөсөн замын аялал, “Хөвсгөл сорилт” унадаг дугуйн бартаат замын зуны аялалд дараалан оролцсон аялагчийг клубын гишүүн болгож, дараагийн аялалд арван хувийн хөнгөлөлт эдлэх карт олгоно.

## **24. Аялал цуцлагдах**

- 24.1. Орон нутгийн удирдлага цаг агаарын байдал болон ямар нэг онцгой байдал тогтоож зам хаасан бол чиглэлийг өөрчлөх эсвэл аяллыг цуцална.
- 24.2. Аялагчдын тоо тухайн аяллын хамгийн бага тоонд хүрээгүй.

## **25. Хууль зүйн хариуцлага**

- 25.1. Оролцогч нь өөрийн болон бусдын эд хөрөнгө, эрүүл мэндэд санаатай болон санаандгүй ямар нэг гэм, хор хохирол учруулахаас зайлсхийнэ.
- 25.2. Зохион байгуулагч тал нь санаатай ба санаандгүй, шууд ба шууд бус гэм, хохирлын төлөө ямар нэг хариуцлага хүлээхгүй
- 25.3. Энэхүү журмын 25.2-оос бусад тохиолдолд гарсан нэхэмжлэлийн хамгийн их үнийн дүн нь аялалд оролцсон нэг аялагчийн төлбөрөөс хэтрэхгүй байна.
- 25.4. Аяллын явцад үүссэн аливаа маргаантай асуудлыг харилцан зөвшилцөж шийдвэрлэнэ.
- 25.5. Маргаанаа зөвшилцөн шийдвэрлэж чадахгүй бол Монгол улсын шүүхээр шийдвэрлүүлнэ.